



Selasa, 12 April 2022

Ogen: Johanes 11:25-26



"Kiniteken Sipegeluhken"



Adi kita ngerana kerna kiniteken bali kap e ngerana kerna ketutusenta ngerembakken diri ras Dibata. Melala kalak si ngaku tek tapi lenga tentu rembak ras Dibata. Kiniteken e me aksi (dikerjakan). Erkiniteken e ngelakoken kai si ikataken Dibata alu la melala tawaren. Tek maka kai si ibahan Dibata e pasti guna kiniulinta.

Percakapen Jesus ras Marta, e me kerna kiniteken man Jesus si ngasup ngelakoken kai pe i bas doni enda. Nina Jesus man Marta, "Aku kap si mereken kegeluhen ras mpekeke kalak mate. Ise tek man bangku nggeluh me amin gia enggo mate...." Tek kam katangKu e? Jesus mereken pengertin man Marta maka IA me si ngaturken kegeluhen ras kematen manusia. Jesus erkuasa mpegeluhken kalak si enggo mate janah IetehNa katawari e ibahanNa. Pengangkan marta sedekah enda Jesus erkuasa mpepalem kalak sakit, e maka mejungut bas pusuhna tupung Jesus la reh ku rumahna tupung turangna si Lasarus sakit mekelek, seh ku kematen. Kenca ipetangkas Jesus maka IA erkuasa mpekeke kalak si enggo mate, bagi si sengget nge Marta. Tapi penungkunen Jesus man bana ijababna alu kata tek.

Tek aku, Kam me Anak Dibata si engkelini doni enda. Pengakun Marta e e rehna i bas pusuhna nari. Itandaina Jesus e labo terjeng manusia biasa tapi Anak Dibata. Penandai Marta nandangi Jesus erkiteken ia jumpa ras. Perjumpaan ras Jesus erbahansa reh bagesna kiniteken Marta. Terapul kal Marta i bas kematen turangna e sabap lit denga kesempatanna jumpa. Icipekna perkatan Jesus, e me mpekeke kalak si enggo mate. Teridah maka reh bagesna kiitekennta man Jesus adi reh rusurna kita jumpa dengen ercacak-cakap ras IA. Kita pe megegeh dengen paguh amin lit si erbahansa ateta mesui.